



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

37. Kalenderwoche – ab 12. September 2010

Mor siehds nisch!

Wennsde so als Durisd irschendwo im Urlaub bisd, grischsde eischendlich nisch allzuviel mid - so von de Siddn des Landes un von de Broblehme un von dor Gulduhr un Geschischde un so.

Wennsde bloß so rumloofn dusd, meene isch jedzde. So wie mor das ehm als Durist odor Urlaubor machn dud. Mor meschde zwahr durschaus manches wissn, abor mor siehd ehm nisch gleich an dor Oberfläsche, was eischendlich los. Un frachn kannsde ehm ooch schleschd, weil die nisch Deidsch kenn. Zum Beischbiel - mir sinn in Groadsjen gewähsn! Das hadsch ja schon ma erzähld.

Ja, Groadsjen - das had doch friehor mid zu Jugoslawjen geheerd. Jedzde gibbds dord außor Groadsjen noch Schlowenjen, Serbjen, Bosnijen-Herzogowiena, Istrijen, Mondenegro, Dalmadsjen, Madzedonjen... - nee, da siehd keenor mähr dursch! Un währ nu had vor baar Jahre geschn wähn Griesch gemachd? Un währ warn da eischendlich de Beesn, währ warn de Gudn?

In Groadsjen zum Beisbiel siehsde noch heide jede Menge sähr scheene Heiser, die gabudd odor bloß halb ferdsch gebaud sin un leer rumschdehn dun. Warum, dusde disch frachn? Besde Laache am Meer, guhde Anbindung ans Schdraßnedz, Wassor, Schdrom... alles da - bloß keene Bauherrn mähr! Drodz dor Schbrachbarrijähre habsch rausgeheerd, dass das Heisor von de Serbn sinn, die damals im Griesch abgehaun sin aus Groadsjen. Abor warum sinn die denne abgehaun?

Freiwillisch? Wenn isch so e Haus ham däde... an dor Mähresgise... das dädsch nisch im Schdisch lassn! Un als Serbe in Serbjen hasde ja keene Schangse e Haus am Mähr zu grischn, weil ehm Serbjen gahr kee Schdigg von dor Gise ham dud. De Gise is zu neinzisch Brozend groadisch. Dähn Resd deelnsich de Schloween, de Bosnijor un de Mondenegros. Dann kommd Albanjen.

Warum ham die Serben ihre Heisor am Mähr nisch behaldn? Sinn se vordriehm wordn von de Groadn? Was is da los gewähsn? Du grischsd das nisch raus! Ooch Arbeitslosischkeid?

Isch hab vormuhded, dass die villeischd gahr keene Arbeitslosn ham. Da had meine Gudste gesachd, also wenn die jedzde ooch in Groadsjen keen Sozialismus mähr ham, dann ham die jedzde ooch Arbeitslose! Abor mor dud das ehm nisch gleisch so sähn!

Sähn dusde, dass bei einische Heisor noch Einschußlöschor sinn... von Schießoreien un so. Un offm Land siehsde manschma so Bunkor un so. Abor mor dud ehm nisch erkenn, was die dord undn vor baar Jahre fiehr een Bleedsinn angeschdelld ham. Iebor firrzisch Jahre haddn se friedlich unnor Diedo sammgelähbd... dann dun die sisch bledzlich wie vorriggd an de Wäsche gehn! Un du siehst nisch warum! Da dud de Sonne schein... da dud das Mähr blädschorn... da dud dor Wind seiseln... Meine Gudste will sisch ja e Buch besorschn - iebor Groadsjen. Villeischd du isch da ooch ma drinne läsn. Ja - läsn! Isch gloobe, isch kann das noch! Abor sowas haddsch mir schon ofd vorgenomm, ma was hinnorhähr nachlesn, abor da is meisdens nischd draus gewordn - mid dor Nachlese! Vorlese däde sowieso bessor sein.

Eduard Sachsenmeyer